

KERATAN AKHBAR

Tarikh Siaran : 7 MEI 2025 (RABU)
Akhbar : BERITA HARIAN
Jenis Akhbar : BAHASA MELAYU
Kategori Berita/Isu : NASIONAL
Mukasurat : 2
Tajuk : 'SEKTOR AWAM PERLU HENTI PEMBELIAN GOPOH AKHIR TAHUN'

'Sektor awam perlu henti pembelian gopoh akhir tahun'

KSN bangkit isu pengurusan kewangan tidak berhemat jejas kecekapan sumber, persepsi

Oleh Samadi Ahmad
bhnews@bh.com.my

Putrajaya: Amalan pembelian tergesa-gesa pada hujung tahun atau *Christmas Shopping* dalam perkhidmatan awam yang menyebabkan pembaziran sumber perlu dielakkan sama sekali.

Ketua Setiausaha Negara, Tan Sri Shamsul Azri Abu Bakar, berkata pengurusan perbelanjaan yang tidak berhemat, menjejaskan kecekapan penggunaan sumber dan boleh menimbulkan persepsi negatif terhadap integriti dan tadbir urus kerajaan.

Shamsul Azri berkata, Laporan Ketua Audit Negara (LKAN) membangkitkan isu pengurusan kewangan kerajaan, namun penyelewengan dan pembaziran sumber awam masih berlaku.

"Jika diabaikan isu ini menjadi semakin kompleks dan tiada penyelesaian yang tuntas, ia akan menjejaskan kredibiliti dan persepsi masyarakat terhadap penjawat awam secara umumnya," katanya.

Bellau berkata demikian dalam majlis perasmian Seminar Perakaunan Pengurusan 2025 bertema "Perakaunan Pengurusan: Dari pada Data kepada Pembuatan Keputusan" anjuran Jabatan Akauntan Negara Malaysia, di sini, semalam.

Teks ucapan bellau dibacakan Ketua Audit Negara, Datuk Seri Wan Suraya Wan Mohd Radzi.

Shamsul Azri berkata, penjawat awam perlu memastikan ketelusan, integriti, kebertanggungjawaban menjadi teras kepada prinsip dalam tatakelola dan etika.

"Kerajaan MADANI memberikan tumpuan untuk mengoptimumkan perbelanjaan awam dengan menyemak semula asas perbelanjaan dan pengagihan sumber yang terhad bagi memastikan kecekapan, keberkesanan dan nilai untuk wang.

"Penerusan pelaksanaan dasar



Wan Suraya (kiri) ketika ditemui media pada majlis perasmian Seminar Perakaunan Pengurusan 2025 di Putrajaya, semalam. (Foto: DERNAMA)

ke arah subsidi bersasar membolehkan kerajaan mengurangkan pembaziran dan ketirisan serta menyediakan ruang fiskal untuk menambah baik bantuan kepada golongan rentan," katanya.

Syor audit diberi perhatian

Bellau berkata, kerajaan juga mengambil langkah positif dengan melaksanakan pindaan Akta Audit 1957 yang akan memberi kesan positif melalui skop pengauditan terhadap pengurusan wang awam.

"Usaha itu juga memastikan syor audit sentiasa diberi perhatian serius dan diambil tindakan sewajarnya oleh semua pihak sama ada Kementerian, jabatan dan agensi serta mana-mana badan, termasuk syarikat menerima wang awam.

"Jabatan Akauntan Negara Malaysia sebagai agensi peneraju perakaunan pengurusan di semua Kementerian mengambil inisiatif pelaksanaan melalui pengenalan Pekeliling Perbendaharaan Malaysia PS 13 - Pelaksanaan Perakaunan Pengurusan," katanya.

Shamsul Azri berkata, pekeling itu untuk menerangkan dasar dan pelaksanaan perakaunan pengurusan melalui pengenalan Perakaunan Pengurusan dan Pelaporan Strategik atau dikenali *Strategic Management Accounting and Reporting (SMART)*.

"Penekanan perakaunan pe-

ngurusan akan diberikan ke atas aspek nilai faedah yang terbaik sebagai pelengkap kepada pengurusan fiskal kerajaan.

"Usaha ini secara langsung dapat meningkatkan tahap kecekapan, keberkesanan dan akauntabiliti Kementerian dalam mengurus kewangan, risiko, sumber dan prestasi perkhidmatan awam dengan memastikan penggunaan sumber secara optimum," katanya.

Shamsul Azri berkata, semua ketua setiausaha Kementerian yang juga bertanggungjawab sebagai pegawai pengawal di Kementerian masing-masing dan memastikan keberkesanan pelaksanaan perakaunan pengurusan serta pelaporan SMART bagi meningkatkan ketelusan dan akauntabiliti dalam setiap keputusan kewangan yang dibuat.

"Penjawat awam perlu mengambil langkah proaktif bagi menimba kecekapan teknikal yang kian kompleks dalam kewangan dan perakaunan serta melengkapkan diri dengan kepintaran bukan kewangan untuk meningkatkan keberkesanan amalan perakaunan pengurusan di sektor awam.

"Adaptasi teknologi berasaskan analisis data raya, kecerdasan buatan (AI) dan automasi pintar dapat membantu agensi kerajaan mengumpul, menganalisis serta mentafsir maklumat kewangan secara masa nyata," katanya.